

lis Gnovis

■ **BUIE.** Cjape la biciclete... e pedale

Une iniziative gnove, un pôc fûr dal ordenari, che e nulis di romanticisim, chê inmaneade des scuelis mediis di Buie, mighe par câs un país di champions di ciclisim. Le àn clamade “Prendi la bici e vai”, e le àn pensade pai arlêfs de prime medie, che a parteciparan a cinc leziions, trê a son technichis e dôs pratichis, che ju viodarà peâts su la biciclete a cori par un percors che al jere za stât sperimentât al Liceu Magrini-Marchetti di Glemone, a Tumieç e di altris bandis. La intenzion dai promotôrs e je chê di educâ i zovins a cjapâ la bici e lâ ator pal Friûl, magari dismovint cussì il lôr interès pe tiere li che a son a stâ, ma in dute sigurece, fracant sui vantaçs che chest sport al puarte ancje ae salût. E propit la salût in biciclete, lis contis dai champions e la educazion stradâl a saran i arguments des leziions technichis, biel che ae fin dal cors ducj a cjaparan la biciclete e, cun sintiment, vie pes culinis dulintor.

■ **MUEÇ.** Une vidielute salvade dal elicotar



Po stâi che li vicin che e rumiave, no ves viodût che e jere une buse, e cussì e je colade intun foradôr in localitât Riuç di Mueç, un puest cetant difil di rivâ e pericolôs. Figurâsi la disperazion dal paron, ma i socoridôrs a son rivâts a salvâle e a tornâle al proprietari. Nol è stât facil: si è tratât di un intervent une vore complês, sedi pal puest che pe pôre de puare vidielute, che o podês pensâ in ce stât che e jere. Al è stât il personâl de “Speleoalpino fluviale” di Udin cu la squadre di Tumieç e l’elicotar di Vignesie a disbredeâ il voluç. Si son calâts tal foradôr cun technichis alpinistichis e une volte rivâts vicin de bestie, viodût che no veve feridis, le àn cenglade cuntune imbragadure speciâl e le àn sigurade cuntune binte al lincin dal elicotar, che le à tirade sù cun gracie, e puartade intun lûc sigûr par consegnâle al paron. No si sa se la vidielute e je stade plui contente par vê svolât pe prime volte cuntun elicotar o par vê metût i pîts par ben su la tiere.

■ **CUAR DI ROSACIS.** Un cjaçadôr al sbare ai cenglârs cence movisi di cjase

Impen di lâ ator pal bosc a cjapâ sù foncs e a cjaçâ cenglârs, un cjaçadôr dal puest al veve pensât a un gnûf mût di cjaçâ chestis bestiis, di fâlu comut di cjase sô, propit dal so zardin, in face ai cjamps dulâ che a passonavin i cenglârs. Cence fastidis e cence preoccupâsi pai vicins di cjase, che a vevin pôre che cualchi balin de sô sclope nol centrâs il bersai. Secont la investigazion dai forestâi, che di un pôc lu stavin tignint di voli, il cjaçadôr al faseve svicinâ lis vitimis vicin cjase sô, ufrint lôr mangjative che no ’ndi vevin mai avonde, pûr savint che dâur di mangjâ al jere improibît, e daspò al sbarave cu la sô sclope ai malintopâts. Par chest i son stadis contestadis diviersis violaziions, che al varà di parâsi, e ancje chê di tignî in cjase rêts pai uciê. Cumò i cenglârs no si svicinaran plui a chê cjase, magari displasint di no cjatâ plui tante mangjadorie; ma almancul no coraran il pericol di ricevi une sclopetade su la schene...




Miercus 26	S.te Dolfine	Domenie 30	I Domenie di Avent
Joibe 27	S. Valerian di Aquilee	Lunis 1	S. Aloï
Vinars 28	S. Mansuet	Martars 2	S. Cromazi di Aquilee
Sabide 29	S. Saturnin	Il timp	Frêt.

	Il soreli Ai 26 al jeve aes 7.23 e al va a mont aes 16.26.	Il proverbi Cui che al vent stope, al viest di sede; cui che al vent sede, al viest di stope. Lis voris dal mês Tes zornadis soregladis, lait a dà un cuc se al co- vente gjavâ vie jerbatis, fueis muartis, claps.
	La lune Ai 28 Prin cuart.	

Udin tal ’500 “urbs magnifica et amplissima”

Dispès si viôt dome chel che si vûl viodi. Zuan di Ravene, mestri tes publichis scuelis di Udin dal 1359 al 1392, daspò di vê magnificât il Friûl cemût che al veve fat il certaldês Zuan Boccaccio tal so “Decameron”, al ricuarde Udin come citât impuartante par dignitât e par numar di abitants, pal ampli so zîr di muraiis, par vê dut ce che al coventave par vivi, ma ancje – sintût sintût – pe grande socialitât che lui al ricuardave cun “summa voluptate”, forsit par vie des sôs frecuentaziions tes betulis citadinis che ancje in chê volte, come vuê, no manjavin. Ma ancje il patriarcje di Aquilee Marino Grimani, doi secui daspò, al clamave Udin citât “longe magnificentissima”, ben che l’olandês Zuan Jansen, tal so “Theatrum urbis terrarum”, le clamave “urbs amplissima et magnifica”, ma tal so câs si tratave di un sintût a di, parcè che nol risulte che al sedi mai stât a Udin. Pal patriarcje Grimani, bontât sô, cundut che al veve il guvier “in spiritualibus” dal patriarcjât, a Udin al veve fat dome cualchi scjampon, preferint al so palaç udinês la miôr vite in chel di Vignesie. Si podarès ancje acetâ par buine monede cheste magnificence par amôr di patrie, ma al reste il fat che la realtât, in chê volte, e jere dabon diferente. Dit che al è difil fâsi une idee avonde precise di cemût che la citât si slargjave in chei timps, massime parcè che vueris, taramots e ativitâts umanis a son rivadis a scancelâ in gran part chês olmis, o vîn di di che al è ancje difil rivâ a ricognossi cuâi che a jerin i contors de antighe,



Svilup de citât di Udin tal 1463

Zuan di Ravene, mestri tes publichis scuelis di Udin dal 1359 al 1392, al ricuarde Udin come citât impuartante par dignitât e par numar di abitants, pal ampli so zîr di muraiis, par vê dut ce che al coventave par vivi

modeste capitâl dal Friûl. Metin in bande chescj cantins, e disin che secont la opinion dai citadins di in chê volte, par lôr citadins, la citât e il so cûr a jerin comprindûts dentri de sô tierce cente di muraiis, fate sù dal patriarcje Raimont de Tor tal secul XII, e limitade di chei che a clamavin “puartons”, ven a stâi des puartis internis di Glemone, Sante Lussie, Graçan Posciel, Aquilee e Cividât. Po dopo a rivan i borcs, dentri de gnove cente, scomençade dal patriarcje Pagan de Tor viers il 1440. Si trate di borcs par mût di di, che al sarès di clamâju come vilis, cun cjasutis bassis di contadins, separadis di orts, di braidis, di zardins, di piçui muruts, di “paladis”, dulâ che si podeve cjatâ in bondance, toblâts,

stalis, ledanârs e mussulins. O vin ancje un document, une sorte di statistiche, che nus fâs savê che tal an 1560 si cjatavin, in chei puescj, 1.400/1.500 cjasutis. Almancul ai prins dal secul, une vore di lôr a vevin il cuviert di paie, la façade, massime chê che e lave dal prin solâr in sù, di len neri par vie dal fum; lis stanziis a vevin pocje lûs e mancul aiar, a jerin bassis e cun tante umiditât che e spissulave dai mûrs. Dut câs ancje se il Comun, a parti dal 1502, al improibive, a chel che al faseve une cjase gnove o le meteve a puest, di fâ un cuviert di paie, e plui indenant al improibive di doprâ il len pes façadis des cjasis, no ducj a sintivin di chê bande, tant che il Comun al veve metût dongje cierts ispetôrs cul voli lunc, di mût di segnalâ lis infrazions, che no si sieravin, come vuê, cuntun dai tancj condons. Cussì, a un predi che al veve fat il cuviert de sô cjasute in paie tal borc di Ronçjîs, i veve ordenât di disfâlu, e istès al veve fat cul paron di cjasis des bandis dal borc di Graçan, che al veve scugnût disfâ la façade in len, e fândi une in muradure. Dut chest no parcè che lu ves imponût une comission pal bilisiamet, ma parcè che si veve une pôre mate dal fûc, che ducj si ricuardavin ancjemò dal brusarili che tal 1419 al veve brusât, tai borcs di Vilalte, Glemone e Sant Lazar passe 2.000 cjasutis, cun animâi e personis, e chei dal 1471 e 1481, che a vevin sdrumadis cetantis cjasis e tantis fameis che i “studefûcs”, in chê volte, no jerin rivâts, ma lafê no, a distudâ par timp.

Roberto Iacovissi

Peraulis in dismentie

par cure di Mario Martinis

> **CUDUMAR**

s.m. = cetriolo (dal latino cŭcūmĕre)
Cressino i cudumars tal ort?
Crescono i cetrioli nell'orto?

> **CUFUL**

s.m. e agg. = buccia dell’acino dell’uva svuotata dal succo (da cŭfĕre per cŭbĕre, dal greco kufós ‘curvo, piegato’, mentre il significato di bozzolo deriva dall’aggettivo greco koifos ‘leggero’) I cufui metiju vie par Meni che al à di fâ la sgnape. Le bucce dell’acino conservale per Domenico che deve fare la grappa.

> **CUINÇ**

s.m. = bigoncio a doghe, due delle quali più lunghe e bucate per infilare un bastone per il trasporto, vaso di legno; conzo, misura principalmente di vino. (voce continuatrice del latino congius ‘misura per vino e olio’) Sâstu dimi trops bocâi che son tal to cuinç? Sai dirmi quanti boccali ci sono nel tuo bigoncio?

> **CUINÇÂ**

v. = condire (cibo), potare (piante); acconciare, conciare (dal latino *comptiĕre ‘adornare, aggiustare’, derivato da comĕre ‘ornare’) Delie e cuinçe il lidric cun masse vueli. Adele condisce il radicchio con troppo olio.

> **CUMIERIE**

s.f. = la terra elevata e rialzata tra solco e solco, prodotta dall’aratro nei campi (dal preromano celtico *gumb-ĕria) Cemût si fasial a no preparâ plui lis cumieriis! Come si fa a non predisporre più i lunghi monticelli di terra tra i solchi!

> **CUCÂ**

v. = sbirciare, guardare; cogliere, pigliare; avere i frasconi (la voce è da confrontare con il derivato cucula, ed è diffusa nei diversi significati anche nel veneto cucâr ‘soggiardare’) No sta dome cucâ, va a di alc! Non sbirciare e basta, vai a dire qualcosa!